

November 14, 2019

www.awemainta.com

www.facebook.com/awemainta

noticia@awemainta.com

583-1400



AWEMainta

15
año

DAPHNE LEJUEZ A DECLARA SU MES INDEPENDIENTE

pagina 2



Daphne Lejuez a declara su mes independiente

E miembro di fraccion di MEP, Daphne Lejuez a dicidi di retira for di MEP y consecuentemente tambe como miembro di fraccion di MEP. Via di un carta di un deур-waarder, dirigencia di MEP a ser poni na altura di su decision.

MEP no a spera e forma di proceder aki, pero esaki no nifica cu no tin Gobierno. Al contrario, cu un miembro menos, lo sigui traha pa adelanto di Aruba, manera e lider di MEP, Evelyn Wever-Croes a duna di conoce.

Tin tur indicacion cu e ley di Serlimar t'e causa di su retiro. Daphne Lejuez no ta y no tabata di acuerdo cu e ley aki. Y e no a sconde su opinion. For di dia cu el a expresa su mes, Daphne Lejuez a pasa un ola di buling. El a bira e di tres dama di MEP, cu a bin ta experiencia un situacion, cu ora tin diferencia di opinion e presion ta masha fuerte. Pero mescos cu e 2 otro miembronan den pasado, Daphne Lejuez a para duro pa su opinion.

E pregunta a bira despues cu Daphne Lejuez a anuncia di a bira independiente y kico awor?

E "sabionan" di MEP a bin hunto y a analisa e situacion. Por a sinti cu tin division, pero finalmente decision a cay pa no bay eleccion awor, maske cu tin Mepista cu nan ta confia di lo gana eleccion. Pero mihor keda, pasobra ainda tin hopi trabao pa haci. Y e actual coalicion ta kere cu sosten di 11, nan por sigui traha, si tin boluntad. Pero observadornan ta bisa te ki dia.

Daphne Lejuez a trece tog al-gun punto di interes padilanti, y a admiti cu e ley di Serlimar a bira e motibo final cu a pone dicidi di bandona partido MEP y fraccion y pa declara su mes independiente.

El a cansa di wanta un cantidad di insulto y intimidacion for di propio coleganan den partido. Nan a bin ta acus'e di a bende su mes cu un conocido comerciante p'e no sostene e ley di Serlimar. Daphne Lejuez fuera di ley Serlimar, tin problema tambe cu e ley di BBO y otro cos.

Daphne Lejuez a desmenti cu ya ta papia di afiliacion na un of mas partido politico. Mientrastant e lo keda den Parlamento haci su trabao segun su consechi, defendiendo interes di Aruba.

Awor Lejuez ta ser considera di a horta asiento di MEP, pa cual ya a cuminsa demanda p'e entrega dicho asiento.

Segun constitucion, e asiento no ta di partido, sino di e persona cu a huramenta p'e asiento, sin importa cuanto voto el a haya.

Pa awor, Lejuez ta bisa di lo keda den Parlamento, y defende loke ta husto. E hecho cu e ta independiente, no ta nifica cu e ta bira oposicion. Si tin leynan cu ta merece su voto, e lo vota pe, y esnan cu e no ta di acuerdo, e ta vota contra.

E no tin pensa aworaki riba su futuro politico fuera di e dos añanan cu falta como Parlamentario. E no a dicidi esey ainda y awor su enfoke ta pa sigui traha pa locual el a huramenta pe.

Un cos ta sigur, maske e retiro aki tabata den aire, tog el a sorprende hopi hende den MEP y dirigencia di partido a admiti esaki, siendo ainda nan tabata na mesa intercambiando di opinion.

Den politica semper mester trata na yega na un solucion, pero no haci manera Daphne Lejuez a haci, segun Presidente di partido, Hendrik Tevreden.

